

- उपराष्ट्रपति ओहदा सारू चुणाव काल व्हेला-काल ई नतीजा रो ऐलाण कर्यो जावेला।
- राजस्थान हाईकोर्ट री डबल बेंच एकल खंडपीठ रा एस.आई. भर्ती रद्द करण रा हुकम माथे रोक लगायी।
- मुख्यमंत्री भजनलाल शर्मा मसाला कॉनक्लेव मांय कह्यो-स्थानीय स्तर माथे ई खाद्य प्रसंस्करण ने बधावो दियो जावेला।
- जालौर, सिरौही, बाड़मेर अर जैसलमेर मांय आज कठे-कठे भारी बारिश रा आसार-काल ऊँ प्रदेश रा घणखर हलकां मांय बिरखा रो जोर कम पड़बा री संभावना।

000

देश रा उपराष्ट्रपति ओहदा सारू काल चुणाव व्हेला। एनडीए महाराष्ट्र रा राज्यपाल सी.पी. राधाकृष्णन ने जद के इंडिया ब्लॉक सुप्रीम कोर्ट रा पैळी वाळा जज बी. सुदर्शन रेड्डी ने उम्मीदवार बनाया है। उपराष्ट्रपति रो चुणाव संसद रा दोन्यू सदनां रा सदस्यां वाळो निर्वाचक मंडल करे है। मौजूदा दौरा मांय लोकसभा मांय 542 अर राज्यसभा मांय 239 सदस्य है। ई दफा उपराष्ट्रपति चुनाव मांय वोट देवण वाळां री तादाद 781 है अर 391 वोट हासिल करण वाळो उम्मीदवार जीतेला। चुनाव पाछे काल सिंज्या ई वोटों री गिणती कर र नतीजा रो ऐलाण कर दियो जावेला। ध्यानजोग है के ई साल जुलाई महीना मांय वां बगत रा उपराष्ट्रपति जगदीप धनखड़ रे स्वास्थ्य कारणां रो हवालो देता थकां इस्तीफो दे देवण रे कारण ओ चुनाव करायो जा रह्यो है।

000

प्रधानमंत्री नरेंद्र मोदी आज भाजपा अर एनडीए रा सांसदां री प्रशिक्षण कार्यशाला रा समापन सत्र मांय भाग ले रह्या है। संसद परिसर रा बालयोगी सभागार मांय दो दिन री आ कार्यशाला काल ऊँ चाल रही है। ई दौरान सांसद अर पार्टी नेता न्यारा-न्यारा मुद्दा माथे विचार कीनो।

000

राजस्थान हाईकोर्ट री डबल बेंच एकल पीठ कानी ऊँ लारला दिनां दिया ज्या एसआई भर्ती परीक्षा रद्द करण रा हुकम माथे रोक लगा दीनी है। न्यायमूर्ति संजीव प्रकाश अर संजीत पुरोहित री खंडपीठ रा हुकम रे मुजब मामला री सुणवाई पूरी व्हेवण ताई एकल पीठ रो हुकम लागू करण माथे रोक रहवेला। सब इंसपेक्टर्स कानी ऊँ पैरवी करण वाळा वकील आर.एन. माथुर बतायो के डबल बेंच ओ फैसलो अमर सिंह अर दूजां री अर्जियां माथे सुणवाई पाछे दीनो।

000

विधानसभा मांय आज रो दिन ई हंगामादार रह्यो। शून्यकाल मांय कांग्रेस रा विधायक सुरेश मोदी नीम का थाना हलका मांय कानून व्यवस्था रो मुद्दो उठायो। ई पाछे सदन मांय विपक्ष रा नेता टीकाराम जूली मंत्री ऊँ बयान दिरावण री मांग कीनी। श्री जूली कह्यो के केवल एक विधानसभा हलका मांय ही नहीं बल्कि पूरा राज्य मांय कानून-व्यवस्था रा हालात खराब है।

सरकार री ओर ऊँ बयान नी आवण परां कांग्रेस रा सदस्य हंगामो सरू कर दीनो अर वैल मांय आ र नारा लगावण लाग्या। लगातार विरोध रे कारण सदन री कार्यवाही बार-बार टाळणी पड़ी। शाम चार बज्यां ताई सदन मांय कामकाज ठीक ढंग ऊँ नी चाल सकी, हालांकि भोजन री छुट्टी रा ठीक पछे सदन मांय हंगामा बीचे राजस्थान मत्स्य क्षेत्र संशोधन

बिल 2025 पास कर दियो ज्यो। ई बिल मांय गैर-कानूनी तरीका ऊँ मछलियां पकड़ण माथे जुर्मानो बधावण रो प्रावधान करी ज्यो है। ई पाछे सदन राजस्थान आयुर्विज्ञान संस्थान जयपुर विधेयक 2025 ने ई विपक्ष रा हंगामा बीच मंजूरी दे दीनी।

000

राज्यपाल हरिभाऊ बागडे आज नई दिल्ली मांय राष्ट्रपति द्रौपदी मुर्मू सागे मुलाकात कीनी। ई दौरान वे राज्य रा न्यारा-न्यारा मुद्दां माथे चर्चा कीनी। ई पाछे श्री बागडे प्रधानमंत्री नरेन्द्र मोदी ऊँ भेंट कर र विकास ऊँ जुड़्या न्यारा-न्यारा मुद्दां रा बारा मांय चर्चा कीनी। श्री मोदी राज्यपाल बागडे रा प्रदेश मांय एक साल रा कामकाज री सराहवणा कीनी। वे राज्यपाल कानी ऊँ राजस्थान मांय डेयरी, सहकारिता अर प्राकृतिक खेती सारू कर्या जा रह्या कामां ने खास बताया। श्री बागडे कानून मंत्री अर्जुनराम मेघवाल सागे ई मुलाकात कीनी।

000

मुख्यमंत्री भजनलाल शर्मा किसानां ऊँ खेती-बाड़ी सागे डेयरी अर मसाला उद्योग ऊँ जुड़बा री अपील कीनी है। श्री शर्मा आज जयपुर मांय राख्यी ज्या राजस्थान मसाला कॉन्क्लेव 2025 मांय बोल रह्या हा।

मुख्यमंत्री कह्यो के सरकार खाद्य प्रसंस्करण सारू स्थानीय स्तर माथे ही कोशिशें करेला। वे कह्यो के भांत-भांत रा मसाला री उपज लेवण सागे राजस्थान जीरा अर ईसबगोल री उपज लेवण मांय अगाड़ी है।

000

मुख्यमंत्री फूड पार्क अर इन्क्यूबेशन सेंटर समेत 226 करोड़ रुपया रा खर्चा वाळा 143 काम ई जनता ने सूप्या अर नुवा कामां री नींव रखी। जळसा मांय कृषि विपणन बोर्ड री ओर ऊँ बणायी ज्यो राज स्पाइस एप ई जारी करी ज्यो। कॉन्क्लेव मांय मसाला री उपज लेवण वाळा, बेचण वाळा, सहकारी संस्थावां अर प्रोसेसिंग करण वाळा भाग लीनो।

000

प्रदेश मांय घणी बिरखा रा असर वाळा हलकां मांय जनता ने साता देवण रा कामां रो मुख्यमंत्री भजनलाल शर्मा आज जायजो ले रह्या है। जयपुर मांय वां रा दफ्तर मांय व्हे रही ई मीटिंग मांय जिलां रा प्रभारी मंत्री अर प्रभारी सचिव भाग ले रह्या है। ध्यानजोग है के लारला तीन दिन मांय प्रभारी मंत्री अर सचिव आप-आप रा प्रभार वाळा जिलां रो दौरा कर र भारी बरसात रे कारण उपजा हालात रो जायजो लीनो हो। घणी बिरखा रे कारण जनता ने व्ह्या नुकसाण री भरपाई सारू आं कानी ऊँ दी जा रही जाणकारी रा आधार ऊँ कार्ययोजना बणायी जावेला। ई बीच उपमुख्यमंत्री दीया कुमारी आज अजमेर जिला रा बोरज गांव रो दौरा कीनो। उद्योग राज्यमंत्री के.के. बिश्नोई सिरौही मांय अहलकारां सागे मीटिंग कीनी। वे जनता ऊँ एहतियात बरतण री अरज कीनी।

000

प्रदेश मांय चाल रह्या बिरखा रा दौर बीच आज बाड़मेर मांय आखा दिन ज़ोरदार बायरो बाजण सागे बिरखा व्ही। लारला 24 घंटां मांय कठे-कठे घणी ज़ोरदार बारिश व्ही। सब ऊँ बत्तो 25 सेंटीमीटर पाणी माउंट आबू मांय बरस्यो। तेज बारिश ऊँ सड़कां टूट जावण रे कारण सैलाणियां ने आबूरोड़ ऊँ माउंट आबू जावण ऊँ रोक दिया ज्या है। दूजी कानी सवाईमाधोपुर मांय बारिश मंदी पड़ गयी है, हालांकि बीसलपुर बंधा ऊँ बत्तो पाणी निकाळबा रे कारण बनास नदी मांय पाणी रो लेवल बध ग्यो है अर केई गांव जिला मुख्यालय ऊँ कट गया है। पाली जिला मांय जवाई बंधा ऊँ ई बत्तो पाणी निकाळ्यो जा रह्यो है। बालोतरा री लूणी नदी मांय ई लगातार पाणी आवण ऊँ सांचौर अर जालौर रा गेला बंद व्हे गया है। श्रीगंगानगर मांय घग्घर नदी मांय बाढ़ आवण रे कारण उपजा हालात ने ध्यान राखता थकां सूरतगढ़, विजयनगर अर अनूपगढ़ री सगळी स्कूलां अर कॉलेजां मांय आज अर काल छुट्टी रो ऐलाण कर दियो ज्यो है। ई बीच आज जालौर, सिरौही, बाड़मेर जैसलमेर अर आरे-सारे रा जिलां मांय ज़ोरदार बायरो बाजण सागे कठे-कठे भारी बारिश व्हे सके है। राज्य रा बाकी हिस्सां मांय कठे-कठे हल्की ऊँ मझला दर्जा री बरसात रा

आसार है। मौसम विभाग काल ई जैसलमेर अर बाङमेर ज़िलां मांय कठे—कठे भारी बारिश री संभावना जताई है। राज्य रा घणखर हलका मांय आवता एक सप्ताह बिरखा मांय कमी रो अनुमान है।

000

जीएसटी परिषद जनता रा भला ने ध्यान राखता थकां जीएसटी री रेट ने युक्तिसंगत बणावण री मंजूरी दे दीनी है। जीएसटी सुधार केई हलकां मांय रेट कम कर र जनता री जिन्दगी आसाण बणावण मांय मददगार साबित व्हेला। इण ऊँ कपड़ां रो उत्पादन खर्च कम व्हेला अर घरेलू खपत अर दिसावर मांय बिक्री ने बधावो मिलेला। जीएसटी सुधारां ऊँ रेशा, सूत अर कपड़ा सस्ता व्हेला। सिलाई मशीनां माथे ई जीएसटी री रेट 12 फीसदी ऊँ घटा र 5 फीसदी कर दीरीजी है। भीलवाड़ा ट्रेड फेडरेशन रा उपाध्यक्ष प्रेम स्वरूप गर्ग कह्यो के अ सुधार म्हाणी समृद्ध वस्त्र विरासत ने बचावेला।

000

आज विश्व फिज़ियोथैरेपी दिवस है। कसरत रे ज़रिए ईलाज रा खास काम ने बतावण अर इण रा फायदां री जाणकारी देवण सारू हर साल आठ सितम्बर ने ओ दिन मनायो जावे है।

000